

榆塞紀行錄

一
函
一
冊
五

榆行
金鑑
記

江苏工业学院图书馆
藏书章

雪苑席裕駟署

光緒十二年夏
李氏代耕畫刊

序

從來形勝之說恒視邊塞爲重輕漢城朔方而匈奴歛迹唐築受降而回鶻拊心其規畫在榆林之北而榆林以固宋視綏延爲重鎮而西夏跳梁明扼花馬池爲要區而套虜滋擾其經營僅及榆林之南而榆林以困得失之勢千古判然而要必按之圖書諏之父老一山之向背一水之原流一屯一堡之廢興夷險研之於先事者審斯措之於當境者安是未可以倖致焉吾友李大令雲生蜀人也少侍宦於滇長効力於黔游於燕魯而仕於秦一時輟迹所經多交其賢豪長者山川之阨塞

風俗之變遷咸發爲詩歌而著爲圖說其研精渺慮欲
得一當以自攄其所蓄夫豈僅沾沾尺寸而已耶今年
夏以海疆不靖奉檄籌餉於榆林因卽耳目所及撰榆
塞紀行錄四卷榆塞者前代之鉅患時撫時叛終其世
未嘗稍戢迨我

朝控制得宜邊鄙獲安垂二百餘年雖然有志之士籌
畫時艱不怵於所危亦不溺於所安蒙古爲我屏蔽歲
久力微其勢不足以資禦侮而俄寇方張虎視北鄙固
不獨海疆之足爲我虞也乾隆間伊犁甫定不識其道
里遠近咸就齊息園詢之始得其詳傳文忠公征緬甸

大軍從戛鳩江進偏師從普汭進賴趙甌北片言而改
塗卒獲濟焉士大夫左圖右史矻矻窮年非於世盡無
裨亦視乎所用而已昔涼州水草非崔浩不知松漠道
路非洪皓莫辨是編所錄又豈徒爲記里之鼓而投詩
之囊也乎秋九月騷曾題長句於後大令復囑爲序因
泚筆書此以誌其梗概焉云爾光緒乙酉臘月邗江顧
騷撰

叙

將欲使歲時記內句擲金聲邊塞詩中語驚石破聽悲
笳于紙上奏鐃吹于行間盡除羅綺之詞一洗箏琶之
響則必黃河遠上高吟敕勒之詞紫塞長征兼錄旁行
之字惟是清時偃釐誰從出塞之軍絕域屯田不著徙
戎之論卽逢豪客好聽伊涼亦惟擬飲馬之行作射雕
之賦而已豈知山川形勢酌古尤在準今風土人情百
聞不如一見必親閱歷迺可流傳此李君雲生榆塞紀
行錄所由作也雲生蜀國詩人長安吏隱身行萬里書
讀五車前奉大府之文遂有北征之集當其乘風問渡

冒雨登程其嘯也訶嘻甚矣憊馳驅王事路同蜀道之
難鞅掌風塵志在吳船之錄衿裏無異甘苦攸分蓋上
郡素號瘠區而三輔曾遭兵燹花門燄虐艸埜塵飛劇
憐鴻澤之哀嗷惟剩蝸廬之陶穴霜淒延水誰陳鄭俠
之圖月冷鄜州早墮少陵之淚須記平夷堡外五戶畱
邨可憐無定河邊千秋洗恨民懷樂土鎮是苦泉石童
顛而土不毛地荒寒而人絕少幾家破屋罕聞雞犬之
聲何處長亭易見豺狼之跡其凋敝已非一日欲生聚
猶待十年驛路經行流亡未復有不攬轡躊躇停驂太
息者乎然而心存利濟不同兒女之情境歷難辛益吐

英雄之氣豈必侯封萬里始號奇男何妨記仿南游先
言古蹟可據鞍以起艸當磨盾之書勛非徒覓句詩灣
均足補遺志乘觀千章之古木知爲中部橋陵望一片
之飛沙曾照甘泉烽火茶房村外斜照窺人翟道山前
寒雲送客地名銀谷何時驄馬來遊宮號玉華共說大
龍曾入种世衡壘因澗築偶得寶刀韓蘄王里以人傳
誰藏甲鏡清涼山好共稱范老威名統萬城荒堪笑赫
連僭僞考南仲之王命朔方早見于周論北地之行軍
用武最雄于漢園水園水辨論各有異同九原五原建
置宜分先後自祖龍更爲郡縣至勝朝尤重邊防舉此

數端皆宜紀載如能高詠豈負壯遊况平身至榆關目
空艸地俯眎萬千部落開拓遠近河山弔古戰場作新
樂府知累代皆憂河套惟我

朝乃受藩封恭讀

御製之詩詳稽

聖武之記當日羽林萬隊親隨夏后之龍此豈游牧千
羣歲出周宣之馬然則受降城外歛貢臺堯能不食苦
如飴和聲鳴盛者乎又豈止遠行邊地廣譯方言詳徵
吐瀛什賁上證知唐桑艾渡奢延之水能悉初名訪折
氏之村可參野史高奴鑄鼎字見吉金沙南有碑名存

貞石既可續成隸釋又能斟定輿圖他若沙虎伊威河
魚賴尾一補雅訓一注水經雖甚微乎亦足異矣且夫
游行者境也著錄者才也使非記事有珠何能振聲似
玉雲生則論文律細汲古功深久稱倚馬之才夙擅雕
龍之技旣誦詩而達爲政雖權稅亦不傷廉黽勉從公
播通人之令譽高歌出塞追射虎之家風茲以鴻博之
詞更寫烏絲之格可稱雙絕奄有三長記如宋之東坡
詩則唐之十子允爲定論共賞奇文當擇日以開雕先
付關中之梓如衆星之羅列請觀天上之榆

光緒十一年歲在乙酉東坡生日甘泉弟毛鳳清敘

跋

往予駐軍靖邊嘗逐賊甯塞馳騎於風沙冰雪中遠瞻
大漠天低如蓋攬轡吟敕勒歌古戰場文茫茫身世不
禁淒然淚數行下然於邊庭風景未能寫作今讀雲生
詞宗榆塞紀行錄岑律瓌奇當與斛律老翁李華並勝
雲生爲文波瀾浩瀚有長風萬里之勢詩復遒健可喜
所謂君才無施不可宛谿漁隱譚麐

題辭

興化顧
錄耳山

驅車直渡奢延水統萬城邊吹角起男兒奇氣紛鬱蟠
下視長城一坏耳李陵臺圯黃河奔斷鏃煙霾土花紫
誰識敗壘荒屯中幾輩籌邊人拊髀揣測形勝窮變通
披剔山川備原委莫作尋常吟眺看量沙聚米從茲始
文人好爲邊塞辭一洗詞場舊羅綺規取橫山議河套
畢竟游蹤誰至此星軺歷徧圖洛春收拾遺聞補青史
西豐東勝三受降風捲驚沙見餘址馬文淵後田子春
事業生平自邊鄙此老胸中饒甲兵豈屑雕蟲逞奇技

方今中外同一春漠南漠北供頤指惟有天驕海外馳
鱣浪鯨波逐颿駛把君詩筆轉自慚中書禿矣吾何恃
會當盾鼻飛檄文雪夜從君執鞭弭

錦縣

賈春暄

如亭

鎖鑰資雄鎮賢勞重上臺風霜行役苦星火簡書催計
相能謀國司農善理財貪功恐貽誤深念濟時才

古道莽荆榛驅車閱歷新兵荒無善地仕宦有傳人陰
磧塵沙暝空碣草木春北征諸什在讀罷意酸辛

一卷行程記千秋著作名風塵留宦跡詩句雜邊聲白
日雕陰道黃沙款貢城壯游今已倦爲子意縱橫

元龍湖海士豪氣近如何官小詩名重家貧酒債多風
沙滿行篋笳吹入高歌無定河邊路行行叱馭過

榆塞紀行錄卷一

記上

潞河漁者纂

青門萍社訂

光緒甲申海疆多事饑饉不供司農有開源節流
之議直省奉行乙酉二月陝藩葉公檄守丞牧令
分赴各郡邑籌辦開源十事之六余奉榆林之役
吳大令煥齋使延安張大令子漁使綏德相約偕
行劉太守翰卿同州方太守矩門陶司馬宣三鳳
翔趙刺史惠溪商州王大令子雅張大令念曾
彭大令古香西安史大令虎文劉大令崑秀漢中
黃司馬震寰梁大令岐山興安張大令竹西邠軋
危大令壽三郡皆北山邊苦之區頻年氛祲人民
田鄜州

流亾此行實有歎焉道中多暇凡山川人物風俗
聞見所及記之簡端不負鴻爪所至而已挂一漏
萬識者諒之

二月廿六日丙申晴大風偕煥齋子漁兩大令出西安
北門三十里馬神廟渡渭十里渡涇三十里永樂店
二十里宿三原縣趙孚民大令留住署齋竝晤哲弟
洽軒茂才論詩昆弟與余交皆洽聚談夜分始寢是
日羅雲峰參戎爲其太夫人設醮同往弔之

廿七日丁酉陰微雨與孚民別二十里樓邸鎮二十里
陵鎮二十里覓子鎮二十五里宿耀州晤鄭執葺刺